

来鹤亭诗

吕诚

文硕阁

wenshuoge.com

目录

关于我们	3
提要	5
原序	6
卷一	7
卷二	14
卷三	18
卷四	25
卷五	31
卷六	37
卷七	42
卷八	48
补遗	53
附录	58

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

来鹤亭诗 元 吕诚

钦定四库全书

集部五

来鹤亭诗

别集类四

元

提要

（臣）等谨案来鹤亭诗九卷补遗一卷元吕诚撰诚字敬夫崑山人工於吟咏诗格清丽与同里郭翼陆仁袁华相唱和尝於园林蓄一鹤後有鹤自来为伍因筑来鹤亭并以名其诗集考集中第一卷多岭南诗二卷有洪武辛亥南归重渡梅关诗云去年窜逐下南溟万里归来鬓已星辛亥为洪武四年是明初尝谪迁广东已而赦归其缘何事获谴则不可考第八卷诗内有洪武癸酉纪年癸酉为洪武二十六年而杨维桢前序作于至正七年丁亥至是已四十七年计其时诚亦耄矣诸书皆称吕处士无言其尝仕于明者则仍元遗老也集不知何人所编维桢序称尝和其古乐府自上京至江南謠弄若干首今集中皆无之则原序虽存诗已多所散佚非其原本又顾嗣立原本百家诗选称其尚有既白轩竹洲归田诸稿今所见者维此集或维桢所言在於他集之内欤

乾隆十年月恭校上

总纂官（臣）纪昀（臣）陆锡熊（臣）孙士毅

总校官（臣）陆费墀

原序

●来鹤亭集原序

苏之邑凡六大率风浮俗淖大家尚气势交关贵人视文艺蔑如也独崑山多才子魁出者往往称吕袁袁曰子英吕曰敬夫也两人为诗风流俊采皆一时之选予固未能优劣之予诗喜乐府古体子英虽多为予和之敬夫又必争鸣於右自上京以下至宫闈江南謡弄凡若干首敬夫作黄庭楷缮写成要予评且曰予诗非先生弗能知弗能知能评者寡矣知而能评而引说於其首舍先生谁人哉曰嘻诗有情有声有象有趣有法有体而禅巫之提唱武士之叫呼文墨生之议论不在有焉故予每评诗不有其有而有其不当有者皆非诗也姑以商之又草野烟萝边塞台阁之不无异也谈诗者以地异律焉易地则不能也予观敬夫未必不为朝廷侍从才也敬夫在楚而蔚然之言足以钟鼎一时侍从焉於戏人之才也又何以地律哉虽然吾於敬夫不无感者矣代有兰台芸阁之居而其言覆野俾诵敬夫之言其不泚然在颍者敬夫可以予说出之矣至正七年三月三日铁■〈遂〉老人会稽杨维禎序

崑山为州竝东南之海夷方之物坌集丛至卉服鸟言之人贸焉杂处其间虽比屋能坐致富赢然其民不幸不闻礼乐文物之懿亦日趋於愚而已彼秀民能读书为士负文艺之奇往往见之於四方鸿儒老生交口相许予虽旦暮出入廛中其冠服修好而民莫知察也余尝崑山取友得四人焉郭羲仲陆良贵袁子英三人之为诗或雄或雅或温厚或流丽跌宕虽或不同要皆能去夫险阻僻陋之习其一人则敬夫敬夫成童时尝从予受学既长益气夷色壮学端识敏自知奋厉且工为诗其词多奇丽清婉出己意见不肯剽取古今人言是皆盛世治平之气而使然耶不然何其声一出於和且美也敬夫又能取友羲仲相与议论可否其资亦深矣乃哀其为诗若干卷杨君廉夫叙之其言固足以取信当世予可略矣然予以敬夫虽处而未仕而杨君亦因其材质之美而许之亦何所不可也使他日诵敬夫之诗而徵予言或者知其不诬矣至正戊子春上巳日昆阳郑东叙

此书先公壮年授徒时所抄自己丑至今藏之已五十有一年矣惜其集中於吾崑往事蹟着録颇少无以考见前辈嘉言善行之一二县志载公为娄东钜族少力学淹贯经史於世利淡然无所好所居有园圃若山林之胜尝蓄一鹤复有鹤自来为伍因筑来鹤亭邑宰屡聘为训不就卒老於乡噫视今大家子弟欲求如公又可多得哉天顺三年夏五月望崑山後学郑文康记

卷一

●钦定四库全书

来鹤亭集卷一

（元）吕诚 撰

游石湖次五峯李著作韵

三月石湖湖水涯绕城山色过楞伽队队行春柘枝鼓陰陰新雨石楠花

和张伯雨鹤亭夜坐韵

草阁清宵中淦淦苍筤四壁影疎疎天头云过多於鴈池里星移或似鱼

怀迂善斋寄希先生

絶爱徵君斋阁好哦诗竟日未能来桥头梔子侵江色坊里桐花覆雨开

立春日试笔

正月一日立春日已喜冰霜昨夜除闾阖卿云扶帝座东南佳气满坤舆玉盘彩缕谁能共雪
树梅花政待舒坐忆故人春雨里草堂尊酒幸相於

送道士郑蒙泉北上

一道荣光指北辰七星文剑烂如银上皇频赐双茎露阿母时迎九色麇灵籟满旗飘婀娜卿
云团盖护轮囷天门夜奏金龙简愿祝无为寿圣人

寄谢张贞居所惠诗文

外史高居灵石坞湖山寂寂重余荣平生道园虞太史故人圣井薛玄卿手捉麈尾玉同色眼
看鸥波秋与明五十篇诗句句好小笺龙凤字纵横

池亭雅集得回字

池阁清冷晓四开风泉满院殷轻雷谢家草色侵衣上司马琴声到幕回琼树亚枝飞鹤子红
梁蘸甲膩蠡杯诸郎醉墨淋漓甚未絶风流宋玉才

戏赋禁体雪

剪水仙人驾玉虹散花来自蕊珠宫八埏总入洪蒙内万象同归太素中鸛影翩翩微映月蝶
羣阵阵巧随风谢家此日夸清辩盐絮由来未儼工

暮春来鹤亭谩兴

綠树轩窗燕子过清陰密覆小陂陀笙调凤殊新簧澁础润龟趺宿雨多落絮游丝空散漫埜
情幽思欲如何日长倦倚乌皮几闲染霜毫试衍波

次韵答郟九成苏城冬夜

哦诗起坐城头屋梅气生寒近榻前钟鼓时闻高阁报鴈鸿或与断云连好怀忆得幽人共清
事多为百虑牵我有草堂池水上思归明日买吴船

寄周子固先生

汝南先生予所钦暮年筑室大江浔妙传邵子先天学独得濂溪太极心金鼎芙蓉长候火雪
巢风月自鸣琴期君乞与青囊术草阁梅花重一临

登苏台怀古

一月长洲花乱开酒酣携客一登台绕城山色临吴会满地溪声走越来北阙天高星使下西
陵日落钓船回独怜泰伯荒祠在烟雨金铺长綠苔

赋带露櫻桃

万綠藜中綴木难折来灵液尚漙漙玉纖香剥鷄头软仙掌寒分鹤顶丹天酒淋漓樊子醉月
盘璀璨汉臣看不妨更漬薔薇水润我谈玄舌本乾

秋晚

鸡号天未明柝静四隣寂疎星如聯珠残月悬殿壁风清鹤在林露重水成滴危坐絕百非嗒
然丧形质大明启东方云霞半空赤

巢云为道士赋

道士炼白云构之玉山腹可泊兼可栖非槎复非屋盘礴太素中万象入毫粟朝驂一青鸾暮
返两黄鹄驾言往从之期君大丹熟

李五峯伯雨廉夫希仲夜集来鹤亭上

璆璆环佩玉锵鸣夜燕蓬莱卫叔卿饕餮雷文商爵古驹虞雪操舜琴清藏阁座暖春屏锦舞
剑星流璧月城客散琼台风露冷梦中时见许飞琼

上柏台

铁冠十载柏台仙居官无事清且贤凤凰九苞出丹穴麒麟五色下青天霜飞白简枫宸迺云
拥露车风雨边尺一明朝唤归去声名已作路碑传

栖云为玉山某僧赋

山僧爱山复爱云绕座云山天所借山云与僧有宿契故向云间筑僧舍飞来玉山都是云枕
席屏帷云作藉朝与云耕暮共栖云来云去任东西亦知此身无住着强把栖云壁上题我意
山僧忙戏剧有女如花招不得平生故说色是空一榻白云空是色是空是色总无凭且与浮
云过此生却笑林端双白鹤结巢养子老营营

七月十五夜看月得明字

秋来见月人皆喜我独感时非世情河北弥漫无故道吴东凋丧不聊生欃枪夜发光如日鼓
角秋高声满城门外大潮天地白好歌桂楫击空明

南海道中

海树排云出江潮过雨浑船通柑子港山绕木绵村

其二

深深乌石渡渺渺白鸥波忆得荷花里江南夜雨多

其三

一雨晚来霁冥冥野色分江明衔塞日风颭落洋云

其四

果熟杨梅雨林蒸茉莉风飞云天上白旭日海边红

大庾岭留题

晨兴散策云封寺巘岫天开紫翠图一水南来分百粤大江东下入三吴

其二

霜旭开晴晓出关冲寒驴子蝟攢攢西风百里南雄道绿树丹枫满意看

南行舟中

南食有底不可意北客相逢若介肥何事大官供蜜耳塘厨将炙乏朱衣

其二

山中无江多是溪英川侧近有猿啼修竹宁同曲水会桃花还似武陵迷

其三

春开冬开岩下花朝虚暮虚溪里家白帽渔郎山色瘦青裙樵女髻鬟丫

其四

转参移斗送年华碧落青松梦里家近似卢敖游汗漫远如贾谊谪长沙

其五

荔枝花发暗蛮村孔雀惊寒减翠文也有北人开眼处碧山无数插红云

其六

小舫无行车马喧短挠轻桨破红烟无由远逐轩皇驾素瑟重听五十弦

胥山晚泊

海风吹雨洒船窗石子沙滩占半江黄帽唱歌牵百丈避人鸥鸟去双双

过十八滩【滩有铜盘狗脊等名唯天柱惶恐最险者】

十八滩头秋水高扁舟掀舞一鸿毛泷声东峡双崖怒石脚牵江百丈牢得食鸬鹚窥浅濑收
鱼灯火守寒皋要知惶恐连天柱未许舟师率尔操

浚阳峡山飞来寺

峡山山上飞来寺绀阁层层树里开僧壁已随猿女化梵钟曾逐蜃楼回万松夹道时闻雨衆壑奔流夜殷雷犹有昔贤珠玉在断碑剥落弄莓苔【猿女乃孙恪妻後至寺还壁化■〈彳〉员〉而去也】

番禺湧兴

炎方吊古易兴哀知是昆明几劫灰黄木湾围南海庙白云山拥粤王台百年此地衣冠尽五月南风舶艚来游览尚余高兴在忽忽莫遣二毛催

其二

莫言南海是天涯远客何妨岁月賒岂谓居夷忘故土直须浮海泛灵槎药洲石卧仙羊去蕃塔风高铁凤斜白首飘零谁慰藉几回松菊梦还家

南海口号六首

象郡大蕃当百粤羊城方面镇南州环山雉堞云霞晓落日旌旗海岳秋

其二

荒服未尝沾政化岛夷今始识衣冠船来争市龙鱼鮓客至先需荔子盘

其三

谁家女儿高髻妆行春踏花屐齿香留客不将茶当酒铜盘菱叶进槟榔

其四

春看客里逢元夕大市小市烧灯红女郎手鼓如杯大半夜荅歌明月中

其五

炎方物色异东吴桂蠹椰浆代酪奴十月煖寒开小阁张灯团坐打边炉

其六

儋耳夷人不着衣缣花黎布满身围轻舟似叶争飘海载得槟榔换米归

越楼观灯

午夜冰轮烂不收又看春色满南州沉香火底鳌山柱翠幕星前羯鼓楼小队天魔花作阵初筵云醴玉为舟要知此景非人世何必罗公作幻游

粤王台怀古

神剑当时斩白蛇华夷悉入卯金家徒怜南海居蛙坎未识中原制犬牙献璧称藩真得计橐金满载已堪嗟荆榛满目荒台下独倚东风听晚笳

游白云诸山三首

半空苍翠薄层崖万木森森碍日车八十老禅延客坐九龙山上试新茶

其二

後岩岩上看飞泉蒲涧曾闻降五仙黄竹断碑前代烬禹粮尧韭昔人传

其三

瑶草春深白鹿眠丹霞楼阁翠生烟偶来石上寻碁局犹恐归时不计年

诃林光孝寺方丈

斜日荒凉噪乳鸦菩提新叶小如茶石廊久雨无人到落尽闲庭诃子花

琪林留题

琅玕照乌几桂浆开玉缸道士喜客至呼鹤舞一双

玄鹤

琪林两玄鹤鸣舞欲高飞白雪侵丹顶缁尘染素衣金秋霜月满玉宇晚风微此日修翎长芝田夜不归

落星渚

大孤白沙明积雪鞋峯夕气散如烟骑龙仙子去不返千古无人舣铁船

小孤山夜泊

彭郎矶头江水深小姑祠前风满林秋天青青秋月白霜里吹箫龙夜吟

来鹤亭集卷一

卷二

●钦定四库全书

来鹤亭集卷二

（元）吕诚 撰

洪武辛亥南归重渡梅关二首

去年窜逐下南溟万里归来髯已星望入西川天一发香炉长绕九江青

其二

归路篮舆鹤背青保昌东下过长亭今朝又向梅关度此是江南第一程

舟中望庐山

庐山昔在图中见落星渚前今始逢云岭半藏红叶寺霜风遥遥翠微钟龙君或居彭蠡泽仙人爱住香炉峯双鳧之舄倘可借飞入前头听玉琮

太湖晚泊

震泽三万六千顷日月出没波涛中冰壶寒浸林屋洞青壁下嵌冯夷宫霜林人家橘子熟晚饭■〈施，舟代方〉楼菰米红羽仙黄鹤时相过知是银河一窍通

秋江待渡图

渔罾落照几家村过鴈行行八字分船搁岸沙潮正落白衣唤渡隔秋云

月下独酌闻桂香

今宵风月尽清酣碧海寒光百丈涵天上散花香第一尊前舞袖影成三方诸玉露清於醪崖蜜金橙小胜柑老兴此时原不浅高歌犹忆望江南

送人之潮兼柬乡友

瘴雨蛮风晚更寒揭阳山色满征鞍临行漫写相思句好与东吴故旧看

题山水图

平湖竹树雨云间忆得渔樵共往还草阁归来三十载至今吟梦绕西山

星夕

八极无尘海宇高眼空百里絕秋毫银潢遥渡神官鹄玉食谁需曼倩桃

其二

天孙俪偶当今夕河鼓光芒耀两旗愧我未能驱大拙可怜瓜果缀蛛丝

醉乡诗

梨花春满碧云洲自是东皋旧所游醇俗从来称緑醕土风大抵是青州五经时向双茎冪三雅何妨大白浮起舞却嫌天地窄崇台更擬筑糟丘

七月望夜得楼字

东池月满重开席不减当年庾亮楼每谓人生须纵饮固知物色总难留萤光过幔还星散云气行天似水流高兴无穷秋满眼山陰何处有行舟

菩提叶灯

宝林菱叶坠天风一落人间便不同云镜荧煌开月匣并刀裁剪费春工星攢蜩翼水绡薄华拥虾须玉栅红从此可传无尽焰五湖今有水晶宫

题墨梅图

罗浮仙子佩珊珊水月精神尺楮间起我江南无限意梦骑白鹤下孤山

其二

凌霄峰顶雪初乾煖逼繁枝玉作团三尺溪藤散香影绦纱笼烛夜深看

题山水图

十年不踏天台路千里西风忆旧游欲向溪头览陈迹白云飞尽万山秋

题牧牛图

十里平原不碍山落花春草锦斑斑太平田里归来日谁识刘家黑牡丹

秋江晚霁图

长天歛尽落霞红草屋炊烟野渡东一带寒沙秋水白荻花吹老鲤鱼风

南归遣怀

海南每忆越王楼可奈乡关万事愁对客花前椰子酒看山马上木绵裘羈縻此日生还喜准
擬归畊老去休愧我无家怜晚岁卜隣终在灊西头

安庆

市楼突兀凌波起楼上女儿未梳洗短篷初泊酒家门新酿玉壶香十里买鱼沽酒桂蒲帆九
月淮村风日美回头遥望大龙山翠屏灭没寒烟紫

归来

纵步归来海上城荆榛满路不堪行问人倏忽更贫富访友凄凉半死生乌宝无神悲积帑青
松有泪对空莹逆流一片门前水犹对青山落日明

南归海上访友

北风吹雁渡江烟访旧东吴晚泊船野水似龙争入海大星如月独当天羌村梦寐青灯下蜀
道间关白髮年兵革漂流无倚着妙予何处赋归田

秋日南归旧隐

秋日旧庐成独坐萧萧落木对晴晖草深道狭行人少地老天荒旧俗非湖海十年情尽改关
河千里梦初归柴门流水依然在酒熟无劳望白衣

暮春感怀

春雨屋上鸣流泉竹间泻清晨望原隰新緑或可藉维时夏春交节序惊代谢悠悠念陈迹默
默观蠹化人生夫如何胡不税尘驾

露坐

虚庭坐凉夕宵永觉衣薄犬吠古塔铃乌啼野城柝感旧心孔哀怀人兴殊恶仰视斗杓倾西林月初落

行春曲送人之杭便道省姊

清明一百六桃杏漫山谷送子武林行草涨吴江绿吴江柳丝千万条青青远映垂虹桥扁舟不用蒲十幅短歌荡漾随轻挠东风夜泊官河渚明日升堂拜家姊言长口岁会面难既覩云胡不欣喜人生会合良可怜感极无言泪如洗子今勿谓行路难有酒宜饮饭加飧流光去人若流水富贵於我一鼠肝西湖三月花飞残六桥烟雨空蒙间老夫不到四十载至今梦绕南屏山湖山应怪别来久此行历览亦希有归来写作行春图为尔题诗三百首

送钱道士游武当

武当诸峰何壮哉大朵小朵青莲开玄圣高居天地户赤日下照金银台神龟六眼电光走山鬼一足云头来道人再拜望北极应带满身星斗回

寄廉夫

杨子十年官不调如此末州下吏何洞庭铁笛龙吹得天上琼书鹤寄多车子看花将一辆雪儿行酒艳双歌时时对客教弦索绣领单衫月色罗

闰月二十四日陪馆士秦文仲陆良贵奉省臣命祭崑山东斋龙洲刘先生墓

黄鹤矶头风雨秋中原一望使人愁羣臣谁决和戎议九庙犹衔误国羞慷慨鲁连宁蹈海凄凉王粲更登楼荒冈四尺先生墓再拜酌之双玉舟

来鹤亭集卷二

卷三

●钦定四库全书

来鹤亭集卷三

（元）吕诚 撰

和顾玉山诗韵

春来世事益艰危怪底闲情强赋诗杨柳愁空陶令宅荷花吟徧白家池眼前陵谷惊迁变客里江山喜护持两度寄书烦慰藉相从深愧负幽期

题庐山道士云松诗卷

道人结屋云松间白云为室松为关夜深骑鹤上天去云在虚空松在山

题美人图

綉牀风暖鬱金裙晓起蛾眉八字分翠管成龙吹怨曲云梭衔凤织回文茶■〈廿廌〉醪熟春江雪豆蔻花开晓树云照檻扶桑红日透自援彩笔赋东君

题买臣负薪图

会稽太守贫贱时负薪行歌妻哂之百年未滿决絕去断弦破镜离鸾飞五马金鞍照流水富贵归来动乡里莫怨故人无古心却视新夫羞欲死落花离离辞故枝浮云去去无回期结交义薄有如此栢舟三复共姜诗

题极目亭

海虞亭子层闌上高兴清秋爽气俱历历吴山明落照茫茫淮甸入荒芜兴亡千古看棋局晴雨四时开画图日日凭栏瞻北固仙人借得一双鳬

归田杂言四首

鸬啼屋东桑水车鸣埜田烦暑正郁隆气燎如燔煎老农事耘耨爬沙手胝胼禾黍既芄芄露叶相新鲜幸雨公家苗遂我粥与饘藜藿充饥肠籩簋覆余屋食指稍林林生计冀丰熟江山悦性情诗书贮便腹白玉不可为庸庸滋後福

其二

菑墉啓北窗清飈飄然来泠泠溉烦襟濯濯净纖埃桃笙展琉璃菡萏溢霞醅白羽致不挥羲皇安在哉

其三

茫茫天壤间出门竟何之白日运寸晷流光倏如驰即鹿败无虞亡羊以多岐浮生虽殊途至老乃同归

其四

祥麀狩而出仅与野羊般所不如孤豚在檻犹在山飞龙何神奇薄游霄汉间嘘吸出云气施泽何曾慳

既白水轩

水轩如笠大聊作一枝栖晚饭长腰米朝盘短股羹江湖双短髻日月两醺鷄徙倚郊原望王孙草又迷

南归午日

午日葵榴屋角新过园又复值佳辰柔丝聊结夸儿女细葛悬知赐近臣菰黍无人沈楚泽荔枝此日荐南闽弟兄沦落知谁在自捧蒲觴寿老亲

首夏田家雨中

细雨朝来湿白沙风前整整复斜斜林蕉闲展琉璃叶野蔓疎开金银花田父扶犁驱一犊稚女踏车垂两丫年年梅熟愁蒸暑却爱小池鸣乱蛙

洪武庚申夏四月登玉山顶时雅上人适迁华藏於塔院历览终日而返是夕宿友人家灯前闻雨援笔有赋

晓出城西门荡漾官河艇朝光散晴旭露气拥高迴潮上洲渚没棹发六飞骋前岑献奇状心目快引领青山如故人登陟在俄顷嗟哉二三子怜我作力逞舍舟入苍翠一迳林木静陰藓护危栈古藤络智井暎带列桧杉青黄熟梅杏古师禅定处神物伏精猛山灵诡异工幻迹一扫屏孤塔历劫余傲兀立峯顶後岩古华藏稍复毘卢境泛观盛衰际何物得修永道人出迎客一笑具羞茗清谈竟终日毛骨洒然冷羣鸟亦知还微阳下西岭遄归弗成寐张灯酌楠瘿急雨何方来清声杂蛙黾鄙言讵成章聊假管城颖

初夏南塘

候气分清淑江深暑尚微树高乌晚哺野旷雉朝飞掘笋髡双角烹茶试一旗静中观物理消息岂相违

晚霁

暑雨晚来霁凉飏动竹杉夕阳明古岸新月露尘函孤塔高如栢归云迅若帆脱巾梳短髮局束愧朝衫

中秋对月

贝阙珠宫浩荡开霓裳骖乘羽衣陪素华台上吹笙过天柱峯头跨鹤来养魄桂花云错莫着明蓬髯雪髯■〈髟上思下〉仙人乞我金茎露归向人间作酒杯

田居书怀

僻居娄西村岁月嗟屡过桑麻八口家仅尔免饥饿公田倩牛耕痴儿固慵惰虽乏甘脆供所赖出春磨前荣荫高榆後陂竹千个薰风飒然来自足偿高卧念无谢傅才甘受娄公唾

观刈晚归

堪笑南塘埜老家客来无酒只烹茶池荒莲蛹青房子霜老鸡人绦幘花海气东连瑶浦暗江流西绕玉山斜杖藜缓步归来晚闲看污邪载满车

对雪

急雪飘扬海上村崩腾排拶故缤纷青山竟没羣羊石玉宇低回万鹤云献岁稔丰宁有兆拯时哀痛似无闻奈寒唯咤梅清苦伴我清吟到夜分

戏咏近体雪二十韵

天葩初襍霰倏尔徧尘寰岛屿沉苍翠峰峦失黛鬟冥冥连朔漠混混暗荆蛮低扬才穿竹斜飞已没菅田畴俄变海垄岸忽成山着鬓愁丝湿沾衣爱缬斑骇鸡时散乱像虎不坚顽巧向歌楼密轻随舞袖还覆深欺麦短势重压梅孱幽险皆平坦庀隅丧曲弯填凹攜尺验封涧失泉潺落落遗圭璧疎疎委佩环苍黄怜犬吠堆积伴鸥闲屐印琼瑶迹林排玉笋班有人怀剡曲无马度蓝关融液三江涨飘残六出慳悬簪宜导髮作饵弗凋艰胶酒行诸令聯诗赌百醵色声真是道贞素不藏奸皎洁侵黄里光明耀白间绫衾春帐煖束藁念孤鰥

寄绍隆上人

忆别草堂天雨雪又惊木叶打江波筑居仅隔牛鸣地入室终怜象渡河老去道缘应恨浅从来佛法苦无多侧闻近番归林下信便寥寥奈尔何

戊午七月四日立秋大水异常谩书以记之

洋云翻墨蔽金鸦惊定愁闻雨脚斜潮势驱山平作地秋声连海浩无涯冯夷伐鼓飞龙虎
〈风贝〉母追锋驾鬼车濺濺牛羊浮浪去不胜生聚化虫沙

闻雨

江城戍鼓晓如雷跋涉频年志已灰身外浮云唯一榻卧听风雨海东来

月下怀友

秋庭夜沆寥云影絶纖毫月转清宵迴星临紫极高蚁酹金错落风吹郁轮袍不举山陰棹空孤一世豪

寄娄下则明昆季

忆尔南庄大小山别来秋月几回弯匣龙夜夜鸣孤剑管豹时时见一斑凉露芙蕖开璧沼五
與星斗转银湾好诗娄下知多少半在君家伯仲间

寒食郊行

草软沙平步履轻百钱日日系乌藤市桥风旆梨花酒游女春衫柿叶绫乌帽飘萧明素发石
磨欹侧卧荒陵百年俯仰须臾事游览忽忽愧未能

三江词戲贈

三江口头日欲晡三江女儿自当垆今朝江南送郎去望断东风檣上乌

其二

檣头五两逐风轻听得吴歌惨别情一片刘家河上月照郎直到定辽城

采鲜曲

春水鱼来听卖鲜金鳍银鬣映江天道人久矣忘滋味谁说馋夫满口涎

其二

北海南洋开利孔欹檣侧舵苦诛求胸山寿带白于玉汉江浑不贵槎头

其三

鰠鱼引子沈云黑石首叫羣陰火红密网疎罾知几许海门日日起腥风

其四

昔年岭海味南烹种种殊形不记名独数沙湾马甲柱豪门无此一杯羹

絕句题山水图

大匠求直干汲人竭甘泉所以支离翁幸尔终天年

其二

秃发念冠欹摇齿怯水寒只合东江上开轩把钓竿

一百五日歌

綠杨风急连江雨寒食今朝一百五尽将麦饭洒荒丘漫把春酤酌黄土人生在世无百年流光过眼如流泉生老病死会不免鬼伯那受人间钱忆昔东家万金产甲第青红照人眼云翻雨覆须臾期空铸千年鍊门限门前宾客安在哉梨花杏花参差开海内交游半为鬼有酒不饮心孔哀岂不闻冶城城南古官道道上青山如聚宝清明十见纸钱飞白骨无言卧青草

午日漫兴

年华流水苦忽忽佳节樽前几度逢稚子束刍蓬作虎将军射柳马如龙衰年诗句多多变此日光陰五五重小阁荷香吹醉醒玉蟾高挂海西峯

蝉【旧说蝉未脱时名腹育乃土中朽木所化也首夏闻之感而有赋】

朽株出土即超然登木犹如脱骨仙秋露枝头枵腹满夕阳江上怨声聯于今东海无齐女自昔山川有杜鹃蚓噪若为能比数洁身美荫岂非贤

寄竹房道人伯莹

一春颇讶简书稀皓首空知五十非诗业未能忘绮语箭锋不觉堕初机鸭头水绿浓于酒鹤背云深冷入衣斋鉢似闻亲遣化慈航应载衆香归

寒夜

拥被不成寝挑灯尽夜分雁鸿冲雪过戍鼓隔云闻俚俗皆从贾閭閻不尚文酪奴清意味为我解余醺

漫兴

柴门不出长苍苔今雨浑无好客来忘却鸡豚三月味煮葵烧笋亦悠哉

其二

寂寂高门大道边东风愁锁绿杨烟大儿已入滇池戍嫠妇空耕垄上田

其三

赭服戎戎万里行风飡水宿事宵征金沙江绕乌蛮砦越嶲山连孟获城

其四

雨余江色碧浮空一髮青山落照中去棹休歌桃叶渡行人愁杀柳花风

十六夜对月

月夕浮云变苍狗无术因之彻其郤海风今夜东南来尽卷飞埃絕纖垢碧天万里开冰壶清光落我持盃手宿羽聯翩翻露巢寒兔迷离搗霜臼嘉宾况尔平生懽如此良宵宁可负隣家麴生好风味三百青钱呼一斗桂浆正熟菊未莎蓴羹烂煮橙可□□□倒射白兽光绿波荡摇金虬走老农断葷不止酒喜宾和月吞入口兴酣且致亶亶谈譌成自答呜呜缶百年此乐能几何瓢空更起谋诸妇身闲无事古所贵有客无酒时则否但愿月光长入杯岁岁年年为君寿明朝更上文笔峯探支西风作重九

洪武丁卯九月八日

书屋小如书画船绕屋种菊如花田祁祁大朶鹤翎瘦灼灼卑枝莺羽鲜义熙处士爱三迳杜陵野老无一钱却笑重阳明日是白衣送酒过年年

对菊歌

洪武戊辰岁居竹州书舍种菊数十本秋花烂然终日吟啸其侧因赋对菊之歌而贯酒花下酌以歌之亦老人暮年之一快也

嗟哉秋菊有奇操义熙老人所鍾好亭亭玉立秋风前肯与春芳作同调顾予不惜灌溉劳亦欲因之展清眺西风九日吹东篱乱点秋光入诗料过檐不羡一丈高清容自得真如妙大朵如擎小若仰傍若参陪前者导黄黄白白间红紫整整傲傲絶嘖笑蟾光冷淡卧胎仙翠影葳蕤宿黄鹂天工久已费雕刻老人幸得供吟啸有时倾倒醉篱边有时忘飡哦夕照几度呻吟被花恼防折时时嗔恶少江州不见遣白衣参军何处吹乌帽樵人敢向担头夸城中仅亦能稍稍可能造次负芳期遂使寒香委霖淖岁晚孤根许相托急景如流勿嗟悼歌成自作商音讴天籁潇潇鸣万窍色香勿向毗耶道恐谓吾侬作颠倒

来鹤亭集卷三

卷四

●钦定四库全书

来鹤亭集卷四

（元）吕诚 撰

双清诗

梅花水仙一草木也其生恒在水涯幽谷之间发於草木摇落之後不以荣悴生死异其芳不以春秋寒暑易其操虽穷冬盛雪犹介然与松竹争奇并茂有类乎高人逸士怀抱道德遯世絶俗而高风雅志自有不可及者余虽不敏心甚慕惜之故赋此以识云

怪得荒寒野水滨疎花冷蘂看横陈歌翻玉树多嫌俗梦唤梨云却欠真半点不烦春刻画一分尤仗雪精神蜡团新萼虽同出未免韩公议小醇

其二

湘魂懒上木兰舟沦落江南草莽丘淡色幽香羞自献江空岁晓若为俦素罗微步盈盈月翠袖寒分寸寸秋隔竹闻□灵瑟语吴云楚雨不胜愁

覓菊花

已过西风九日秋苍筤池上若为游似闻嘉菊黄於鹄乞我双栽照白头

其二

洲上黄花满意开倩人更为覓奇栽小桃源里秋如海分取清香一半来

竹枝歌六首寄胡安定

上思下思十万山左江右江如月湾江边神女长留佩天上仙人早赐环

其二

铜柱山前铜鼓声野花蛮果不知名却喜土人能爱客菱叶槟榔相送迎

其三

云开沙净水回回越鸟啼边朱槿开峒里蛮丁不畏瘴朝朝冲雾趁虚来

其四

客棹愁行湘波水凭郎莫唱竹枝歌好山好水春更好不见闻人载酒过

其五

春云如墨瘴烟中鸚鵡羣飞荔子红男儿守家妇当戍粤俗古来成土风

其六

青草湖头春日晖苳罗山上白云飞行人莫听鷓鴣怨陌上花开缓缓归

采莲曲

采莲落日下双舟白縠风轻易觉秋浅浅溪流齐鹤膝青青荷叶过人头

杨柳词

一树千千万万枝枝枝到地弱於丝绿风织雨难成疋纬恨经愁无断时

题翠涛轩为则明作

梧竹幽深处士居八砖日转午陰移到门不敢题凡鸟自篆龙香写好诗

其二

翠葆如云过屋高金风为我扫炎燄五更万壑秋声满疑是仙家驾海潮

其三

七尺乌藤手自操鲤鱼风起月轮高带将一个城南树五贾冈头看翠涛

焚香

六时焚栢子一饭即趺跏陋彼黄金鼎欣余白瓦炉下帘风不起掩卷日将晡扰扰尘中客清闲愧老夫

煮茶

暂彻贝书窗下读旋烹松鼎雨前茶未研顾渚金沙饼漫试洪都露井芽陆子煮经非所贵党家风味不余夸何当满贮中■〈彳 需〉水涤我胸中寸缕瑕

浊醪

野人炊新秬醞酿为浊酒槽头一瓮云玉色浑浑厚乘间运杯勺斟酌任升斗鲸吸助诗狂豕饮欲乾呕仰天大白浮月光流入口

摘菌

菌子白于云罗生枯杨枝地气蒸土膏俨如三秀芝鲜摘色莹润薄美香敷腴饮食贵适口岂谓物细微

芦菔

芦菔出深土内含霜雪清冷然消暑喝快矣解朝醒脆白浑胜藕顽青亦可羹镇州禅悦味从此得佳名

粹饼

玉尘团小饼蔗汁灌中边素可羞宾席斋宜供法筵虚心云片落登豆雪球圆咀嚼吾无间惟欣老齿便

煨蕨

短褐西风里长鑱斲土芝馨香侔粒糗黯色类蹲鴟玉糝从来贵金齏或未奇夜阑深拨火惟有懒残知

谢惠则明秋菱次韵

筠笼遥致百冰丸入口先惊熨齿寒柔指不辞连蒂摘弱肌终免抱枝乾甘芳粹矣斯为美头角嶄然未可干应为文园消渴甚好怀时复寄诗坛

谢惠菜

江乡正月尾菜苕味胜肉茎同牛乳腴叶映翠钗绿每辱隣家赠颇慰老夫腹囊中留百钱一日买一束

谢惠新笋

山人剛得锦綳儿远寄吾家香积厨入馔便须参一味登盘还许配双壶修茎比蔗原无滓瘦节如筇未可扶已有此君休煮箨东林春雨正堪需

洪武二十年春二月十八日过麋州道中

江雾全收曙色开晴沙白白水洄洄笋舆忆得当年路看尽梅花看竹来

过麋州书舍寄葛青城

重来问讯东桥竹竹里鉏云结草堂隔岸淮山当鴈汊半陂春水护麋场交游契濶频搔首今古兴亡一断肠田野不妨聊卒岁宦途何处是康庄

三月二十日过桐庐陆氏故居感而有赋

昔年曾醉陆家池句首从来有所思野哭隣歌如昨日陵迁谷变异当时喧林衆鸟偷樱子卧石羣羊没兔葵莫说华亭千古事故宫禾黍正离离

题青溪仙洞图

曾谒青溪古洞天稚松看种石桥边一条归路朱弦直不到家来五百年

夏日偶书寄友人

竹鸡呼梦出华胥占毕终朝可疗饥隐几云山无百里出门衢路有千岐桃笙麈尾风清暑槐渡鷗波雨散丝尚忆故人怜我老可无新句慰相思

题吹笙仙女二图

森森羽节导云輶鸾背微闻缥缈笙小队霓裳多似雨衆中谁是董双成

其二

鰲背三峯水殿虚天香吹满六铢衣青禽忽报麻姑信独自吹笙月下归

五月廿日雨怀有寄

竹洲草树暗渔庄五月雨多沙水黄蒼卜林深书院小芭蕉叶大酒尊凉乍瞻霁色收屏翳犹

讶车声走阿香井丹征途尘没马怀人幽兴讵能忘

六月

六月赤日困溽蒸一雨洗天如醉醒堆案倦翻遮眼偈垂帘谁究洗心经术花徧地牵云白竹色当檐落酒青欲学成都百钱卜樵床龟壳未能灵

题此筠室即予读书之舍

白首何缘植此筠簣簞洲上语平生前身谩说成龙去老节犹堪作凤鸣玉版老禅时脍炙锦綳稚子且逢迎水霜惜取根株在合与梅花订此盟

西郊老农歌

岂不闻昔人大积郿坞赀烈炷竟然东市脐又不闻醉鞭戲击珊瑚枝祸机一发当咎谁东门牵犬事已昨华亭唳鹤良可吁不如西郊老农夫公田数亩宅一区桑麻环绕水竹居墙陰祝祝五母鸡东风骀荡吹涟漪欣欣农事方自兹江乡春雨已知时綠蓑驱牛扶一犁负囊提榼两小儿服劳执役不吾欺二麦枯时谢豹啼秧鍼出水青欲齐少女犹鸣灯下机老妻漚紑头不梳桑无附枝麦两岐官清不卖二月丝流光去人候如驰转眼秋田黍离离步担牛载官仓输官租已了一事无隣家酒熟相嬉娛醉後耳热歌呜呜人生定分亦何需富贵与我浮云如叫嚣扫迹鼠穴虚四海八荒歌雍熙太平何幸亲见之呜呼西郊老农之乐乐有余鹿门老龐真汝师

答苍簣室图

苍簣之室海西洲挟以苍髯秃尾虬徂谷诸贤图上见渭川千亩梦中游风生枕簟清无暑冷逼衣巾翠欲流我亦因之来少憩恐烦玉版致盘羞

寄杨克斋并求桂屑酿酒

拟向蓬莱一问津只愁清浅久扬尘醉乡重到情依旧素壁留题字已泯雪夜放舟怀贺老秋云把钓梦玄真西风满地黄金粟好酿侬家石冻春

偶成寄友

瑶溪溪水上先世辟林庐漫有江湖思再从木石居树桐留宿凤养竹持竿鱼有子供甘脆衰年岂负予

其二

壤隔南塘路门依野次成初非慵应接自是寡将迎笋蕨搜山得盐醯入市营闲居薄滋味盘
脍敢求精

来鹤亭集卷四

卷五

●钦定四库全书

来鹤亭集卷五

（明）吕诚 撰

寓言

苦瓠若悬痾宜瓢亦宜笙笙将用含雅瓢以供酌烹吾为苦瓠谋任力不任声荐劳鋤鼎间自足资养生物贱终反贵吹万岂其情

其二

少学老无成所守但糟粕譬如福与市涉海求灵药岂不望三山风至辄引却岁阑坐穷陋青灯暎疎箔虽微白足禅自置丹霞博贱贫吾所安饮水差足乐隣家日椎牛不似西隣禴

午日有感

午日南风里千山积雨边白头难讳老青眼尚谁怜酒向清斋止杯从旧俗传陶潜归计是但觉费诗篇

其二

彩衣娛鹤鬓锦字照行囊忽忽经年梦凄凄午日觴西州青瘴合东海白云长便作鸾凰去何妨万仞翔

秋日雨後三首

荒村积雨长蒿莱裘葛駸駸岁月催霜雾不无祥练感丝桐一鼓有余哀

其二

浦口寒潮频有信空中鸟迹了无痕野航落日东西渡黄叶秋风远近村

其三

曲碕茅屋两三家返照垂虹隔断霞风外叶声来似雨莫嗔杨柳不藏鸦

次韵寄澄江白龙寺采师

白龙山色翠离离为爱青山返照迟野渡闲云随杖锡海风吹雨润伽黎断常政儼通三学理事何妨付八支千古澄江净如练令人空忆谢公诗

求亮讲师鈎勒画竹【亮号雨篷】

少时文采贯晴虹老去能侔造化功怪石幽篁开飒爽尺绡寸楮破鸿蒙喜闻旧隐归云锡儼上慈航听雨篷要见此君真面目为烦鈎铁扫清风

星夕露坐二首

次禅客韵海城钟鼓夜沈沈秋入天潢露满襟弦月无声闻玉杵采星何处度金针桃笙石枕悠扬梦柳■〈扎上虫下〉莎鸡自在吟诸相已空泡幻影百年何有去来今

其二

一方明月欸禅扉瓜果寒冰亦可须虚幌疎星流熠燿大江凉露浸芙蕖空华根蒂难寻摘梦境尘嚣费剗除亶亶笑谈无剩语仰看星斗夜何如

神舟曲

时运艘以小舟制成龙形饶歌鼓吹往来江潮中以答神贶云

扶桑日出碧海底圣化东渐千万里林林楼櫓日边来云帆影压三江雨年年五月凌大洋图南九万斯褰举相风之鸟毕逋尾饷道飞供太仓米太仓城下水连空水仙祠前神戾止灵旗婀娜送祥飏五色蜿蜒浪中起撝金伐鼓万夫讴潮落潮生海门里謠唱龙头棹龙尾三日南风过黑水

西庵观洗竹

洗竹移风榻鈎帘对雪峯啐余天竺偈梦熟海门钟耳厌咸阳犬神交剑浦龙松房人不到应有白云封

星夕

虫鸣草迳露华凝畏暑空庭睡未能矮屋纸窗风雨破飞蛾乱扑佛龕灯

秋夜二首

灊灊露气下中天撼撼秋声满树颠无得桂香无鼻孔道人一夜不成眠

其二

砌草虫吟四壁静檐竹摇灯动秋影老来无梦到阳台开门月在青松顶

题画鴈

霜满蒹葭水国秋残汀艚渚故相投江湖兄弟飘零尽白首披图无限愁

星夕友人见访

翩翩飞佩逐归霞絶胜冲寒访若耶贪看双星会河鼓蹇驴馱醉入西家

题杜少陵行春图

徒步归来白发新蹇驴馱醉过残春问渠何处花饶笑韦曲家家正恼人

其二

牢落出同谷凄凉赋七歌日斜驴背上白发似诗多

山居夜坐有怀海滨翁

投老归来未得休半生江海寄浮沤禅房风雪蒲团夜闲看灯花结客愁

其二

海滨老人喜读书十年不出鬓成丝灵椿堦下森森长却胜东家桃李枝

其三

书屋沈沈剑气寒白头无语问更阑向来喜作尊前舞今日尊前欲舞难

寄江南绍隆伯莹

一冬风雪出村稀忽见梅花映酒旗行过江桥迴回首无人寄与绍隆师

题赵仲穆画游骑挟弹图

白马王孙红锦鞵平明按辔百花前金丸迸入他人宅却把苍头打玉鞭

正月廿三日借竹洲访顾藏六于司马庙

一番行春始出村韶华无赖已平分野鸟乱啼司马庙石麟犹卧汲家坟烧痕新绿浑禁雨柳色半黄都染云荡泾桥头有酒卖醉把梨花日又曛

絕句题水仙图

秋水为神玉为骨山矾是弟梅是兄恍然坐我水仙府吾与汝曹俱眼明

春晚苦寒

晚阁春寒户半扃东风窗外雪冥冥破除客况非耽酒却怕寒衾半夜醒

三月廿七日久雨寄葛青城

隣家有竹亦不恶空翠碧鲜连户庭十日风雨水泉暴百里海门云雾溟紫藤花老修竹观黄栗留啼芍药厅青城山人近相见话别桥南酒半醒

喜晴

槐龙倒影散微凉宜男多花开北堂旧日江山惭谢屐於今岁月付奚囊郭■〈鷓，兔代鸟〉已喜无三窟元绪从来有六藏晓起天光入书室瞳瞳红日上扶桑

客至

幽窗谈笑话平生旧研磨穿笔代耕白发满头难讳老青山排闷故多情桃花灼灼浑无语春雨潇潇尚未晴明日兰舟休便发南隣笋蕨已堪烹

暑夕

畏热起独坐风扉聊一开流萤点波去睡犬觉人来缺月半轮上残潮午夜回翻思河朔会未用上吾杯

絕句一首问葛青城疾

椿树生凉午簟余桐花陰转竹窗虚毗耶示疾原非病四百都将智刃除

七言古诗一首赠医

崑之娄西良医曰□□□□□之业累世矣人有疾痛必走先生治无不愈也余□间以衰劣资其药饵之功焉先生赴人之急也不憚跋涉之劳人之求药也自无有贵贱之别其执艺之精而负嘉名也不虚矣姑诵所闻谩为古诗二十韵匪以为报焉先生字□□□自号武陵

武陵先生有奇骨何年得此活人术昔闻梦入阆风巅醉蹋青天霞五色仙人手掉芙蓉旗对面青囊笑相掷囊中白日生光景云篆飘飘皆鸟迹应知此物神所秘区区秦火奚能厄斡旋气运保太和下拯黔黎乃其职酒酣渴饮上池流半生不平俱荡涤归来高卧玉山左姓名颇为时人识白云鸡犬日相闻市壶那与尘世隔碧桃红杏自成蹊赤箭青芝翠如织蠹蛭不损一念仁陰功早已标仙籍嗟余足迹半九州因痴有爱雪满头扶衰每获金石剂是身是病日以瘳木李愧无琼玖报玉环自乏巾箱酬先生高致人所慕守价不二擬伯休宋清远德今复见作传恨无柳柳州

秋日漫兴

塘西老人竹洲居不到塘西两月余黄菊已花急酿酒青山可数聊停车牛羊下来日夕後鸿雁大至霜雨初秋光去人遽如许底事交游会面疎

九日前雨中

已知无地可登临况是孤村风雨深酒为解忧唯有醉菊怜短发不胜簪白鱼出网一双玉黄橙捣蘂三寸金南北睽离佳节过壮游空感昔年心

题秋浦归舟图

碕■〈土斥〉枫林过野桥梵王宫殿在山腰扁舟好趁樵风去莫待寒江落晚潮

其二

秋浦行舟日欲晡秋来到处有蓴鲈酒家鱸具如堪借暂卸西风十幅蒲

题渔樵图

霜满头颅雪满须相逢且莫羨高车吾家有酒今朝熟带叶青柴好煮鱼

枕铭

匪木斯砉匪石斯刻囊括混沌首据是职闲邪存诚进修尔思夙兴夜寐尔其傲之

题壁

青天半夜飞霹雳忽见双龙起墨池拾得织女支机石归来写作无声诗

来鹤亭集卷五

卷六

●钦定四库全书

来鹤亭集卷六

（明）吕诚 撰

寄怀乡友浩然戍横州

分袂每怜秋未半开帆犹记月初圆
客程千里又千里老鬓一年衰一年
令弟喜沾新雨露故乡不改旧山川
悬知献捷归来日重理琵琶第四弦

寄乡友福州别驾

乌石山前听讼稀石榴洞口看云飞
马蹄好踏官街月人在青榕影里归

其二

酿来南酒甜於蜜爱浴山泉热胜汤
退食自公微醉後小姬和叶进槟榔

春雪

逐势婆娑散杳冥欺春禁柳故崩腾
未夸谢女随风絮且作孙郎映册灯
檐溜已呈鱼腹剑庭销谁剪鹤纹绡
老来诗思浑荒澁拟赋梁园愧未能

题陶靖节

晋代高风信少双禄田酿酒漫盈缸
攢眉走入东林社惠远爱之如法幢

题韩文公蓝关雪骑图

逐客何缘路八千孤忠直叩九重天
风凌雪满蓝关道却胜当年孟浩然

己巳元旦偶书

东风又转玉衡杓北望黄云拥赤霄
鹤髮求沾三事禄凤仪今听九成韶
侧闻边雪没草地喜见降王歆圣朝
王化无为天覆帔讴歌率土颂神尧

和韵酬仲庄

自笑离羣久索居暂时抵掌即驩虞准绳吾道俱咸若穀率斯文已跃如稚子斑斑青玉瘦酪奴潏潏碧云腴宝坊会有重游日竹杖芒鞋一访予

和烹箴龙诗韵

雷公使令风火急鞭走雨工头戢戢泥蟠骨脱未能飞野人争奋长鑱入宁须逆鳞不复畏斯须唯闻釜中泣金杯苦酒五色光玉版云腴乳花湿长房见之发长叹麴生一笑恣鲸吸灵物变化不可常骈玉森森佳人立

四月廿四日雨中寄仲庄

四月江乡暑尚微林寒老客未更衣复愁刈麦雨不止况是索租人正饥谷秧出水青青短筍登盘个个肥门外泥深无辙迹相从莫怪出村稀

四月晦夜大雷雨

日月相鬪鹵火中冥冥一色云埋空黑风簸摇海波沸排山倒岳何其雄急电穿窗紫光掣雨脚如麻未断絶风雷半夜龙子归霹雳一声山石裂衣冠危坐谨天威小人破胆始扞舌须臾云斂稍霁威星光惨淡半明灭於乎上天号令岂轻出摧残长养不虚设

题寒山访隐便面

散策冲寒踏冻沙雪晴山色徧天涯奚奴为我囊诗去黄鹤矶头问酒家

相逢行寄仲庄王□□二十二韵兼柬崇恩彻希二闻士时仲庄教书麤川

南山有石白齿齿短衣高歌中夜起衰年无复梦周公访旧凄凉半为鬼平生忧患勿复道三年兀坐竹洲里竹洲隐者更爱客一笑相逢感知已乌几朝朝贝叶书铜瓶夜夜花根水清狂幸不废吟哦自嚼宫商含羽徵潦倒甘为人所嗤肉食者谋那及此緑瑶故人别我久一见胡为不欣喜我居洲北子港南烟树相望才一里书堂匝匝数十弓绦帐萧条二三子弃瓢无緑酒再沽朝盘有罾鱼可煮醉来掩卷自吾伊诗筒日夕相填委暇日过我此筠室逢迎聊复具鸡黍春酤白白涨密云夜韭青青剪新雨五月未稼石田秧掉臂轩轩若霞举人生会合苦不常兴尽归来那复止季鹰岂是为鲈鱼宣圣犹然叹雌雉娄西近番忽相见停午茶瓯细醺缕旧席久荒北海尊新寺花开烂如绮忘情况有八十翁谈玄一洗箕山耳为渠痛饮为渠醉自古浊醪有妙理

和韵酬沈叔祥

白鹤又从辽海归山川良是昔人非郊居作赋谁能继勾漏成丹世已稀灵浪润咽消宿酒飞
花如粟点秋衣荒洲■〈尚卩〉肯同迂辙扫地焚香候竹扉

次韵答耦武孟

犹忆当年应鹄头诗名从此達南洲狂歌赖有千鍾酒豪士今无百尺楼紫蟹白鱼江市晚綠
芜红树海门秋西风开到篱根菊拟向桃源一繫舟

寄则明

近过余草堂以所作诗见示披诵再四词极清丽非余子可侔也欲留少憩过午以母命有他
适力辞去之赋此以谢

之子南港来扣门日卓午手持数篇诗笑揖首屡俯且致寒暄问披吟罢挥麈词韵亦清丽秀
句天葩吐豁然醒心胸顿觉头风愈啜茗少移时聊欲具鸡黍起立前致辞母命曷敢侮弗得
顷刻留轩轩若霞举子实孝友徒冲幼识眉宇卓然有高志余子焉足数寒窗十年灯羣籍饱
撑拄研覃尽精微穷讨嗜清苦纵使拾青紫端若左右取汇为闾里荣遂不忝厥祖不闻先圣
言得之在朴鲁又不见桓生陈绶叹稽古子能踵前蹟大器成簋簠假有勍敌师亦当偃旗鼓
冀其不中辍荣身岂无补送子出门去矫首望江浦

白纸扇歌

闻次安惠纸笔因赋此以赠之

我昔舟泊西江湄椎冰看捣万楮皮江神相顾色惨怆波工自诧手不龟怀金问价云满篋霜
纨失素无晶辉廿年归来存百一制成团扇真絶奇洪炉百炼太古雪紫簣三尺盘屈铁银潢
清影秋监光玉虹冷贯青天月昏日摩娑惊老丑动摇清风生腋肘高堂昼把蝇蚋空魑魅潜
藏飞电走岂不闻戢姥不识王右军茂弘曾障元规尘谢公高风固足尚班女篋笥空悲呻乌
飞兔走急於箭商飈奄忽号枯林呜呼盛衰天地无古今炎凉不易君子心

素室箴为闻次安赋

唯君子之学思不出位安於定分芟其浮慕时止时行无怨无恶知人休之是曰行素诗书礼
乐者善之基轩冕圭组者利之郭孝悌忠信者福之媒权利术数者祸之区居易俟命者为君
子行险徼幸者为匹夫宁皎皎以遁世勿汶汶以畏途日新又新圣贤同归耆叟司规敢言操
觚

有怀来鹤亭

忆昔题诗坐鹤亭修篁欲染客衣青
飞花造次沾歌扇舞鹤留连绕石屏
正擬刘伶为酒颂莫教陆羽着茶经
故人多在青云上独怪江湖老客星

和子英袁先生韵及谢所寄先人志文

交游长是叹睽离白首重逢似有期
老去知非怜伯玉向来好事愧当时
林陰鹤语风生竹花暗笙声月上池
珍重遗文劳远寄知公念我未云衰

其二

频年役役苦屯遭竹杖芒鞋到处禪
南海诸山云外看西江百尺月中牵
豪华销歇随流水潦倒无成休问天
好及耆年同结社玉山佳处细谈玄

题松亭槩士便面

隐者茅亭并水安单罗鹤氅怯轻寒
松声万壑秋如海月下瑶槩不用弹

读宋太史诗文集漫书

金华山下古潜溪秀发英灵间世奇
岁久不闻清庙瑟眼明今见玉堂诗
百年人物推此老一代风流当继谁
颇恨淹留忘坠景遗编徒使後來悲

菊田

余客竹洲三年颇有彭泽东篱之好
古人亦谓菊独以秋花傲兀於摇落
之後非霜下之杰乎昔年曾赋对菊
之歌老兴未已复作菊田一首以纪
岁月耳时洪武己巳秋重九後时书

摇落西风已怆然金蕤月朶为谁妍
人间无地安花宅洲上於今有菊田
晚岁擬寻甘谷老颓龄幸值傳延年
落英浪尽秋香骨许我飞行作地仙

己巳岁冬十一月筑土於三山从王事也
丁夫三十余万人十二月苦寒工虽毕
而未遣家人在役宁无怀思焉遂赋一首

去年椎水上淮水今年荷锺三山尾
风凌肌骨利於锥雪过牛羊缩如蝟
短日经檐惨无色宿麦盖坵青下死
天书早晚下三山坐使黔黎守环堵

题秋林游子图

十里山光入杳冥独骑驴子涧边行
借问前头向何处华阳观里听松声

洪武庚午年正月间游茜之广孝寺

冥搜又起劫前灰
紺阁丹楼一日开
龙伯鬣幢平地涌
象王花雨自天来
日高金壁浮空出
水落银河到海回
欲结莫年香火社
扶筇独上妙高台

访成真观有感

四十年前余访秋云杨外史于成真
维时殿楼竹树森竦邃密其琳宫桂馆
不是过也後十年外史化去世道变迁
天运才一周鞠为茂草荒墟然盛衰之
变有不可得而语者如此今年春因
访旧复游於此而有赋是岁庚午正月
二十八日也

暮年重访成真观
不见秋云竹外楼
枸杞经春皆化犬
朱藤历岁总如虬
种桃道士冯虚去
采药骚人汗漫游
见说蓬莱又清浅
凝将黄鹤问丹丘

题赵子昂画马图卷

灵物降精生倔奇
贡来自是千里驹
天闲潇潇风满旗
立仗不受黄金羁
吴兴写生世所稀
春雷挟之上天飞

仲春雨後生寒有怀苍筤室

东冈二月草芊绵
淦淦轻寒雨後天
杨柳三眠风作恶
樱桃半开春可怜
诗域日荒抛砚石
醉乡时与打觥船
清游每忆苍筤舍
何日重来看碧鲜

来鹤亭集卷六

卷七

●钦定四库全书

来鹤亭集卷七

（明）吕诚 撰

访耦成苍筤轩时武孟制满求仕地有桃源径

蒨草溪东十里余小桃源上见郊居落红石迳和云扫新绿瓜畦趁雨鉏池上此君宜对酒门前长者屡回车此中尚未商山老见说王褒有荐书

江雨轩为耦武孟作

春雨如暗尘江乡昼冥冥幽人感时变於兹事耕耘江雨亦屡作江风穆而清土膏润如酥草木努甲生此境谁为之曰维天之成我艺我稷黍我轩泊我宇晨兴带经鉏宁恤作劳苦嘉苗既芄芄田畷为之喜霜飏一披拂致此岁功美斗酒以自劳共入此室处矧兹值时康乐哉咏江雨

挽胡浩然卒於驯象之横州

忆陪宾席接谈锋廿载论交一旦空东海人人怀伯始佳城郁郁闭滕公死生契濶飞鸿外今古兴亡断简中白首与君成永诀忍将衰涕洒西风

巨浸诗【书异变也今兹二遭矣】

洪武庚午秋七月初吉海风自东北来拔木扬沙虽犀兵万队不足为雄倒海排山堆阜高陵皆为漂没岂沈竈产蛙之足语哉犹记洪武戊午岁秋七月四日亦尝罹此盖大鱼入城之兆也今兹震荡势复过之侧闻三洲一千七百家皆葬鱼腹岂非囿於数者耶呜呼命岂有常乎可不慎欤可不畏欤

庚午七月之初吉断虹挟云蔽西日石尤声撼天为昏■〈风贝〉母驱车走沙石鲸跳鯢擲地轴翻阳烁陰凝神鬼泣银涛驾空山岳摧转眼奔流浸扉壁三江弥漫灭无口孤城潐潐天一碧衰年疲茶动兢畏变白斋心戒夕惕忆昔前年大鱼入三洲漂荡海水立近者侧闻复罹此海湾流尸头濺濺■〈土斤〉塌沙沈絶往来脰断灋深苗不实呜呼上天震怒岂无由谁其尸之谁复诘

覓鞠

余向寓竹洲洲上种菊百余栽绕屋盈圃过者因为菊田今年归草堂似闻秋风驾潮扫荡无遗
凝与吾友求数株聊应重阳故事何如

秋潮横挟雨风颠洲上空闻有菊田香色於人既无有物情在我敢求全颇怜尘世光阴迅似
觉人间雨露偏白髮满头难讳老苍颜衰客强为妍岂唯酒向隣家得自是杯从旧俗传陶宰
不妨多种秫杜陵且莫叹无钱青天鴈影西风外红树秋声落照边见说南庄饶物色少分清
艳到樽前

重阳日有感寄子英袁先生时庚午岁也

忽惊时序忽忽改颇觉飏霜稍稍侵莫说赐萸成往事但知漉菊是初心风高木叶林烟薄雨
过野塘秋水深我於古人应有约只惭佳节负登临

访友

洪武庚午九月廿七日访钮声远於太仓城之正阳门造其室曰洞云四檐竹树盆山清气可
掬因赋此诗并求其画山图云

先生家住正阳门绕屋松声日夜闻大药总消头上雪小山长带洞中云已知济物宜终庆况
是清时属右文却叹吾诗与君画海门风月儼平分

暮冬送友人入杭

湖上蚤梅春可掬江头牒子晚初登从容话别唯樽酒潦倒论怀愧友朋平野云开山见雪太
湖潮落■〈土斥〉留水芒鞋竹杖孤山路白首重游恨未能

东溟生诗为顾某赋

东溟之生何所闻抱艺学古以事亲翛然一室东海村市尘不到絶垢氛坐见三洲渺无垠一
碧万里玻璃盆雪涛银屋相吐吞灿烂浴出扶桑暎是时幽人侍宴温菽水之乐乐天真兴来
挥扫水墨尘下笔惨淡愁鬼神居然耕凿生意存经营态度回阳春百年缣素槩断纹擗襟装
潢称絶伦由其天机出清新能事逸发皆可人素昧平生笑语频一日索诗来扣门嗟余耳聩
目力昏那能复作寒螿呻霜风搜林叶缤纷寒菊艳艳东篱根姑置是事且勿论与子倒尽花
前樽

荆溪棹歌

是冬凿脂山经行於此

荆溪溪上晚山稠沙棠港口木兰舟裹头女子唱歌去水色山光总是愁

其二

大男凿山衣尽红中男操舟惯张篷独山门外北风恶白浪如天怖杀侬

其三

溪上雪消春水高鷺黄新柳暗长桥桥头人家好春酒无情长与驻兰桡

其四

双舟来往愁奈何日日溪中听棹歌溪水西流流不断海门东去作风波

竹枝词五首【夫役凿脂山】

石臼湖头泥水深北风吹折壮夫心别家三月絶音问一纸书来抵万金

其二

腊月欲尽正月来柳条弄色早梅开年华却似东流水又见青天塞雁回

其三

千夫万夫蠹作堆什什伍伍鱼贯腮常兴埠头候粮去红兰街里买薪来

其四

胭脂山头雨雪飞胭脂山前人苦饥山下斧斤夜達旦山上闲云常自归

其五

十八里冈云有无炎风扫地雪模糊山川通塞奚能问闲看清波入太湖

緑净轩为茜上郁敏仲作

緑净轩开秋水湾碧鲜如锦画图间葛洪井在丹光合云母屏深翠雨寒碕上琅玕千个立此
中天地一壶寛合江曾忆韩公赋醉墨须写石阑干

题牧羊图

牧羝絕域卧穹庐廿载空传雁足书属国归时总头白壮心杖节鬓毛疎

题兰竹图

此君风致絕孤超秋佩纫香怨楚骚颇讶江梅专物论不令渠得配三高

棘雀图

素颈乌头浪得名区区粉墨写幽情悬知未省图南志荆棘丛中过此生

寄怀茜川基古

云寮新构竹森森蒨草溪头春水深白酒过於东老醪清诗聊共已公吟松花别甑炊金粉笋
箭当堦长玉簪底事莫年频有约祗缘香火似东林

其二

身闲无事且婆娑转眼流年一掷梭牢落诗怀三月过颠狂花信五更多潮来海市鱼论斗柳
暗江林鸟啁歌颇讶寥寥无信使题诗为问近如何

洪武壬申十二月闻葛青城歿於辽之贬所有感而赋

半生诗酒共登临醉後长闻拥鼻吟抱朴未忘句漏志管宁终负度辽心星垂北极知天远梦
入东吴似海深達士已无身後念临风还为一沾襟

寄谢谿西堂惠纸

闲居岁月暗消磨珍重高人寄素波子墨客卿当谛受老人真欲写伽陀

其二

云璽罗纹幸见投乌皮几上雪凝眸怀人端为双鱼信作赋空慚五凤楼

其三

江草凄迷路不分西林只隔半溪云处时不负平生学慰我长怀别後文

其四

沙路雨多生藓花赤阑桥下酒旗斜望中兰若依稀似凝隔松云问煮茶

其五

翠峯西下连吴会雪浪东来入海门胸次不留元字脚金香炉下铁昆仑

感兴

静室无尘少客过新篁阴曳小坡陀朝来始悟春归尽风里杨花似雨多

其二

窻前幽鸟百般鸣犹有余花照眼明偶尔相遭聊适意固知花鸟亦无情

其三

午帘烟烬瓦炉香漫读残经付一牀底事是非犹入梦固知余习未全忘

其四

落花寂寂掩柴荆满地绿阴新笋生自是老来游兴减江山何处不堪行

其五

日日铙歌响露桡麦秋天气晚潇潇鲑蔬颇为年荒备自向东畦种瓠苗

八月十七日访崇恩净公不遇回途赋

仲秋之月日踰七徒步往访弥天释继时秋阳尚郁陶汗雨淋漓面如炙梅子渡头沙搁舟黄芦滩上泥没膝人生只惜会合稀跋涉终怜老无力邛邛鹑鸪似呼雨树树秋蝉喧午寂禅扉未启白云封一锡行空了无迹东斋西庖具梨茗香饭竟饱毗耶室出门搔首大江横白鸟飞来破秋色

题渔翁图

浮玉山前飞白鹭桃花流水泛家船呼儿去换城中酒新得揜头缩项鳊

来鹤亭集卷七

卷八

●钦定四库全书

来鹤亭集卷八

（明）吕诚 撰

题寒江归棹图

水色山光拥画桥梵王宫殿在山腰扁舟好趁樵风去莫待寒江落晚潮

题春江独钓图

渭川老去兴无余犹爱江山锦不如渺渺烟波舟似叶一竿钓得几多鱼

题秋浦行舟图

江色溟溟接太虚秋来到处有蓴鲈酒家鱸具如堪借暂卸南风十幅蒲

题水墨龙图

画史凭陵造化机研池倾倒墨龙飞生绡半幅春云湿疑是山前行雨归

洪武癸酉五月十二日雨晴散走至则明翠涛轩过午回途漫成一首以寄

既白轩中十日雨晚起扶桑发曙光揜筇缓蹑野人屐看竹竟登君子堂少年豪饮不复作老去读书浑健忘清谈饷午聊自适归去颇愁江路长

五月二十八日重过翠涛轩清坐终日薄暮而归赋此盖书所见也翠涛为竹而得是名余不能无辞也矣

幽人爱竹不吃笋养得修篁个个长五月六月雨不落千枝万枝风自凉苍雪逼人时展簟翠涛惊梦午移牀涓涓清润乌皮几楚楚高揜薜荔墙密影扫堦敷琐碎余音拂水度笙簧孙枝迸地浑疑古老节凌云色更苍三迳旋开真得计七贤避世故佯狂因怀梅友称三絶却笑荷花似六郎白鹤归时云动荡青鸾啸处夜微茫对之可使食无肉衰矣虚惭髯有霜隐几无心开卷帙卷帘随意炷炉香日中见斗瞻霄汉月下吹箫引凤皇物外襟怀老可共闲中滋味淡相忘不寻酒伴鷄豚社误落诗名锦绣坊时复开樽排匝每怜学子走趋蹰兴来久坐无聊赖老去频过也不妨他日成材唯汗简於今触目尽琳琅振衣散策归来後江路迢迢又夕阳

题松雪翁画马图

宛驹万里贡丹霄穹鼻胡儿扞赤绦天廐自多千里骏人间难得九方皋

则明游余杭三桥埠回过余草堂赋酬此

秋日三桥埠行舟野色新乱山围草市荒墟接江津杉竹通蛮獠麋麋贩猎人欲将金粟酒为子拂征尘

老态

久知老必至岂谓便见侵一从今年来稍觉力不任凜凜畏寒暑悠悠念初心凌晨览清镜感叹一何深目昏废占毕头童曷胜簪齿摇食物妨行步愁岖嶮乃知泡幻躯匪石亦匪金人生大化中急电扫光陰安有百年期推迁似难禁理势必应是视古犹视今贤愚同一邱旁人漫沾襟丹桂吹古香万户鸣秋砧且覆掌中杯弹我膝上琴於焉泻孤愤三叹有余音

秋晚寄怀则明余杭未回

雨过秋容净天高露气寒官船鸣戍鼓萤火起渔滩好中明时选休歌蜀道难淹淹忧弱女聊为问平安

题二乔图

乔家倾国缀周孙陈迹空余粉墨存女子那容知许事但令修古议师昏

题天育马图为海城钮声远赋

渥水神驹骏骨全奚官羈勒漫相纏情知不是尘中物春雷挟之飞上天

题枯树图

铁干槎牙翠叶残云根剥落古苔斑大材宁尽天年老不遇工师不出山

九月晦声远留题

十年不蹋海城西杜曲桑麻志已违向来诗酒所游历为问人民今是非物态尽从风气改霜威又作晓寒微出门浩浩尘如海笑对青山一振衣

其二

海门潮上水如烟贺老重维载酒船喜见云山开雪壁幸因郎囷鼓水弦应门僮子清於鹤捣药灵禽半是仙岁晚卜隣应有约几时行李到梅边

寄则明时客於竹洲作

苜蓿花开徧地秋秋声浑在树梢头西风昨夜吹归梦唤起客怀无限愁

其二

几树芙蓉近水低碧沙凉露泣莎鸡月边已有南来雁飞过荻江官渡西

九日则明会族人於翠涛轩席间赋诗见及因用韵答之

九日翠涛当雅集宗人团坐气回春承家幸有青氍旧顾我何妨白发新即席挥毫夸草圣持盃采菊酌花神醉归一道天风晚金粟吹香出兔轮

晚归书事六言

访旧五溪薄暮沙长归路迢遥虚市人家烧烛流水孤村断桥一个残僧待渡数声短笛
遂归樵闪闪昏鸦啼後江风又落寒潮

其二

渔榜溪翁罢钓邮铃稚子传书暝烟含雪欲落腊柳半黄未舒云叶乱随去雁浪花轻逐跳鱼一段诗情画意潇然风景愁予

则明疾瘳喜而赋此以寄

兼旬伏枕废论文走卜迎医岂惮频疾去已如颠趾鼎慎身当似括囊坤挑灯鴈唳陰风厉煮药鸡鸣宿火温寒雪严霜皆历遍东风早晚入重门

宿西庵值雨

晚堤信步一搯筇西望青山落照中禅榻茗瓯春乳白佛龕莲焰夜灯红人间漫说薰天富眼底都成扑地空新雨打窗诗梦破蛰雷又过海门东

寒食日哭坦翁

蒿里竟何在死生从此分擬将寒食泪欲洒暮江云草暗鵲原水松枯马鬣坟平生多述作地

下更修文

太仓周均德晋其先人与余家往还时德晋尚少庚辰己巳以来值风尘湏洞各天一方声迹不相闻者五十余年洪武癸酉秋因访钮洞云见德晋所作山图恍如梦中一见吾故人也遂赋此以伸意并求其写草堂图云

忆昔居海城汝翁我之友子时颐未须我始十八九别来五十年相顾各皓首往事不可追存者复何有前月到城中远访洞云叟殷勤下徐榻翫缕具尊酒谈及子高致亹亹不絶口慷慨有所思我友歿已久惟今颜貌苍秋风飏蒲柳案上见山图尺楮藏培塿羨子材艺优岂复居人後嗟我已踰七见者惊老丑我家娄水西草屋大如斗流泉走松根古木立云薮林密鹤屡巢江近鼉夜吼鉤帘豁冥昧万象入窻牖幽哉抱拙素兀兀但株守洞云绘成图早晚落吾手倩子复写之张壁慰衰朽作诗投故人谅识此情否

醉归

醉归不觉已斜曛稚子驩迎先候门霜林睡觉凉如水树影满窻疑是云

寿彝秉斋

乔木东南扫地空静安留得旧家风清名在昔称高士寿骨於今只两翁腊蚁壶觞秋露白金鱼池馆雁来红桑榆万一皆强健看取年年此会同

题黄鹤山樵画匡山读书图

黄鹤山人美如玉长年爱山看不足醉拈秃笔扫秋光割截匡山云一幅诗豪每忆青莲仙结巢读书长醉眠我欲因之揽秀色双鳬飞堕香炉前

题黄筌画竹鹤图【并序】

右黄筌画竹鹤图一卷已入能品予鹤亭旧有此图心甚惜之散落他室今数十年矣忽於乡友处复见之喜叹无已然尤物自无胫翼而能傲兀人世不与岁月同化亦一奇哉因赋此重为揽古者一慨云

蜀人黄筌写竹鹤数百年间一奇作玄裳缟衣意闲暇老去峥嵘动林壑挺挺玉立双琅玕枝叶扶疎铁钩络忆昔鹤亭有此本鸟散烟销久冥寞今朝忽见喜絶倒老目摩挲殊不恶千年令威安在哉旧物都非况城郭世间此图亦希有重裘尤宜置缣橐高堂悬向明月中应有仙音下寥廓

寒食漫兴书所见三首

杨柳东风日夜颠杏桃无语不成妍水深竟没鸥边石雨重浑迷卵色天节序忽忽无可那物
情汹汹最堪怜荒村闲寂无鸡犬何处人来扫墓田

其二

韶光去我太匆忙驱使闲情入醉乡燕燕莺莺三月暮风风雨雨一春忙加餐未厌青精饭烂
煮那无白石羊老境於斯何足赖祇教世味淡相忘

其三

三月三日雨初晴清旦梳头坐草亭一陂草色为谁绿千树柳条无赖青忧患未平心耿耿衰
迟那遣鬓星星林鸠底事频呼嬾强聒春愁苦厌听

听雨

倾倒天瓢走雨工海门龙过起腥风潇潇午夜鸣山竹如在春江听打篷

来鹤亭集卷八

补遗

●钦定四库全书

来鹤亭集补遗

（明）吕诚 撰

九日雨中杂兴四首

橘柚青青菊未黄满城风雨近重阳天光倒影涵空濶云阵将愁赴渺茫尚忆登临吹席帽谁能随俗系萸囊诗人底事无全句似欲相期入醉乡

其二

风扫陰霾霁色新白沙江路净无尘佳辰宜着挥毫客暮齿唯存见在身自笑千金夸敝帚不妨一饭煮劳薪人间万事皆成幻付与云安麴米春

其三

秋水苹花绕钓矶关河千里雁初飞二毛脱落愁吹帽九月凄凉未授衣玉醴光浮杯笋滑綉糕香膩蟹螯肥物情叵奈多拘束欲假卢敖手一挥

其四

霜降海门天气肃无边落木总缤纷鸥眠野渡芙蓉雨雁落秋田■〈禾罢〉 稴云未有诗篇酬令节祇将茗椀对炉薰月中桂子飘人世时有天香隔幔闻

甲戌岁中秋无月

今夕何夕叹独醒阑风伏雨几时晴为渠满魄当圆景奈此浮云点太清蛟室朱扉应不启兔宫玉杵寂无声何当致我猴山顶醉卧瑶台听凤笙

九月二十三日赴宴定斋晚会归有感

风霜眯目走踖踖媿我闲居寂寞滨今古谁为了事汉关山空忆未归人白头且尽杯中物红树犹疑劫外春转眼尘劳成底事浮云变态几回新

送老僧颐翁归住山中兼简伯莹和尚

老禪归南山相与散吟策维时秋冬交霜雨木叶赤野旷天宇寬足软步履窄擬访织履翁怅望一水隔目致繾綣辞聊以塞吾责

新冬乍寒书怀

一榻清寒恋旧氈饱飡世味意茫然疎林寒日駸駸短残菊经霜故故妍五鼎从来非我志一贫正不要人怜此生本是悠悠者眼底光陰只信缘

三月十二日初度辱外族诸亲过草堂兼有祝颂之词赋此以谢

杏花风暖破春陰既白轩中喜盍簪世事荒荒相聚少霞杯灑灑莫辞深予生初度当三月天与清闲抵万金多谢诸贤为我寿殷勤重感岁寒心

期友不至

长日闲吟步紫苔流光转眼熟黄梅雄风豪雨将春去浊潦深泥少客来老栢叶稀愁蠶瘦草田水满厌鳩催题诗问讯王文学怀抱何时一笑开

挽友歿于旅途

故人藁葬断矶头恨满西风白露洲化鹤不随丁令返骑鲸应伴谪仙游志词谁为鑱崖石旅梦悬知到首丘廿载交游成永诀青山愁对大江流

秋雨中辱翠涛轩则明颁及佳贶次韵用答

风雨潇潇夜晦迷亲朋南北叹睽离世间物态云千变眼底功名黍一炊酒债不妨缘客惯诗名端复畏人知时时甘脆遥相寄况有新篇慰我思

其二

深秋凉思眇无涯余炽蒸人恼阿家海气昏昏云似墨江流泯泯雨如麻旧腔■■〈禾罢〉稭行当刈新壤榛芜次第畚世路只今诚局缩挟仙直欲驾虹查

雨中杂言诗八首寄仲庄则明二妙

数篇遥寄水东隈想为吟哦助笑哈池草已衰无好句阿连空向梦中来

其二

惯识西庄第五桥短藜时复过林皋
藿竹屋江邨路爱听清风响翠涛

其三

独穿斜迳草芃芃攘臂褰衣微醉中
运甕船归鸿雁月采菱歌断鲤鱼风

其四

世谛纷纭岁月长感时怀古未渠央
痴儿若了公家事始信燕山有义方

其五

郁陶未解出村稀雨後凉生日色微
便觉今宵风露重此身从此怯单衣

其六

野老山妻笑语同腰鎌先获泰州红
尝新春玉知非晚喜听笳声夕照中

其七

屈指无多九日阴可能无地一登临
怀人风雨成痴坐抱膝茶烟长短吟

其八

今秋八月甲子雨刈获望晴犹未能
夜祠田祖村村鼓水落鲈鱼港港罾

寄北山讲师基古石尊宿

杖履长怀访北山老僧忘世此中闲
不辞蕙帐来猿鹤要使山林识佩环
海气含霜浮沆瀣溪声和月泻潺湲
老来擬入耆英社分我翠微云半间

题梅雪鹤亭二图

冻云深护白龙堆剪水仙人海上来
夜半鹤归春信到尽将生意付江梅

其二

南屏左股翠模糊写入侬家罨画图
览胜不妨留钜眼草堂堆案有西湖

洪武乙亥春寒漫兴

交岁晴光少凝寒雨霰重水添垂钓石树鼓落灯风晚竿浮蛆粕春盘问笋菰花浑寂寞游兴莫忽忽

寄谢伯莹长老惠林松语录

继述频年备讨论擬将遗教辅宗门藁林枝干宁无本文海波澜更有源叔季奚知师道贵春容重喜典刑存是编不独追金玉会使西江一口吞

风雨连日闭户默坐怀思可知忽翠涛轩以笋蔬之惠走笔答之

春事多随逝水东不堪日夜雨兼风龙归海浦沈云黑鸟啄樱桃落子红老境讵言诗有债醉乡谁谓酒无功鲑蔬向赖西隣笋瓷缶时将五尺僮

漫兴

秋阳烈烈晚风微病叶号蝉色惨凄感旧每因寻友梦诉怀那有上天梯哲人逝矣忧民困嫠妇潜然卖女啼无限新愁禁不得海云深处雁行低

挽乡人

梦破邯郸指一弹旅魂归绕玉山寨无人早悟生如寄有子能贤死亦安壮岁声名何俊爽老怀悲惋独辛酸一坏黄土西风里数尺青松掩袂看

十一月十五日因过翠涛室薄暮风寒遂宿赋此以纪兼简琇南石

坐久不妨闻茗椀深谈未用照青藜寒惊残梦潇潇竹煖覆重衾恋恋绋自笑此身空濩落已胜羈宦走东西似闻胜集东林下细雨无缘过虎溪

腊八日则明以诗寄余言及崇恩至翠涛室不得一见为歉遂次韵寄灵源老师兼简只江开士

交际长怀佛日山南北相望水云间清修久已钦三学妙义终当示八还野渡舟横潮漫漫河洲风定鸟关关灵师倘过云房榻擬对茶瓯半日间

渊明醉归图

谁具壶觞大道边老人倾倒即颓然阿宣扶上乌犍背隐似清风太乙莲

来鹤亭集补遗

附录

附录：

来鹤亭诗九卷补遗一卷（浙江鲍士恭家藏本）

元吕诚撰诚字敬夫崑山人工於吟咏诗格清丽与同里郭翼陆仁袁华相唱和尝於园林蓄一鹤後有鹤自来爲伍因筑来鹤亭并以名其诗集考集中第一卷多岭南诗二卷有洪武辛亥南归重渡梅关诗云去年窜逐下南溟万里归来鬓已星辛亥爲洪武四年是明初尝谪迁广东已而赦归其绿何事获譴则不可考第八卷诗内有洪武癸酉纪年癸酉爲洪武二十六年而杨维桢前序作於至正七年丁亥至是已四十七年计其时诚亦耄矣诸书皆称吕处士无言其尝仕於明者则仍元遗老也集不知何人所编维桢序称尝和其古乐府自上京至江南謠弄若干首今集中皆无之则原序虽存诗已多所散佚非其原本又顾嗣立元人百家诗选称其尚有既白轩竹洲归田诸稿今所见者惟此集或维桢所言在其他集之内欤（四库全书总目卷一百六十八?集部二十一?别集类二十）

书名:来鹤亭集

作者:吕诚（字敬夫；号不详）（元）撰

部:集 类:别集类 属:金至元

参考资料:（《四库大辞典》）

八卷。《补遗》一卷。元吕诚撰。诚字敬夫。生卒年不详。昆山（今属江苏）人。曾于园林养一鹤，后有鹤自来为伍，园筑来鹤亭，并以名诗集。集中第一卷多岭南诗。第八卷诗内有洪武癸酉纪年。癸酉为洪武二十六年（1393），而杨维桢前序作于至正七年（1347），相距四十七年。《四库全书总目》云：“计其时诚亦耄矣。诸如皆称吕处士，元言其尝仕于明者，则元遗老也。集不知何人所编。”诚诗调清丽，有章可循。有《四库全书》本，清光绪三十一年（1905）李氏木犀轩抄本（藏于北京大学图书馆）。另有明抄本（藏于北京图书馆）、清抄本等题名《吕敬夫诗》。

吕诚

吕诚字敬夫吴之东仓人幼聪敏喜读书尤精楷法【玉山草堂雅集】（四库全书?子部?艺术类?书画之属?六艺之一录卷三百五十八）

吕诚字敬夫吴之东仓人幼聪敏喜读书能去豪习家有梅雪斋日与文士倡和其作诗故清

絕云（四库全书·子部·小说家类·杂事之属·菽园杂记卷十三）

吕诚

字敬夫吴之东沧人幼聪敏喜读书尤长於唐三宗师楷法时东沧之俗尚靡独能去豪习事文雅故名士咸与之交家有来鹤亭梅雪斋日与郭羲仲陆良贵倡和其间诗意清新不为腐语东沧之人多诵之（四库全书·集部·总集类·草堂雅集卷九）

吕诚来鹤草堂稟既白轩稟竹洲归田稟敬夫稟

诚字敬夫後名肃崑山之东沧人今隶太仓东沧之俗尚靡独能去豪习事文雅名士咸与之交家有园林尝蓄一鹤复有鹤自来为伍因筑来鹤亭复有梅雪斋日与郭羲仲陆良贵唱和其间邑令屡聘为训导不起卒老於乡所着有来鹤亭既白轩番禺竹洲归田诸稟敬夫少力学师昆阳郑东季明既长益气夷色庄学端识敏且工为诗季明谓其词多奇丽清婉出已意见不屑剽取古今人言其声一出於和且美玉山主人称其诗意清新不为腐语如术花徧地牵云白竹色当帘落酒青灵浪润咽消宿酒飞花如粟点秋衣皆佳句也又善作黄庭小楷缮写其诗成集辄邀杨铁厓评之铁厓题其诗曰苏支邑凡六独崑山多才子魁出者往往称吕袁袁曰子英吕曰敬夫也（四库全书·集部·总集类·元诗选三集卷十五）